

1 San Pedro

Jesu gaji macari wanirãre gojabeoñumi Pedro

¹ Yũhũ Pedro Jesucristo ïgũ buhedore apidigũ ta ãhraa. Eropigũ mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogũ iiaa yũhũ. Mũare õadore gojabeoa yũhũ.

² Negohraguere Goãmũ mari Pagũ “Õpa iigũra,” ïgũ arĩdiro dopa ta mũare beyerũ. ïgũ beyera pũhrũ ïgũ Espíritu Santo mera mũare Goãmũ yarã árĩmorãre acupũ. Õpa ta acupũ ïgũ Jesucristore õaro yũhrimorã mũa árĩboro dopa. ïgũ di cóãro mera ñerire coenirã mũa árĩboro dopa iipũ. Eropirã Goãmũ ïgũ mahiri mera õaro árĩque mũa.

Jesu yarã árĩrã marire mũarogue ïgũ aĩgãborore corerã iiaa mari, arĩ gojañumi Pedro

³⁻⁵ Goãmũ marire turaro mojomoro ïagũ, Jesucristo sĩridigũ ïgũ masa mũriaro mera marire õarã gohrotocũ iimi. Eropa iigũ ïgũ gohrotori mera Goãmũ porã ta wahaã mari. Eropa warã ïgũ mera eropa mari õaro árĩniguicãborore õaro masia mari. Eropigũ mũare ïgũ õari opaburire odiagũ mũare coregũ iimi. Iri mũare ïgũ oburi ne pehresome. Eropigũ ïgũre mũa umupeorãre Goãmũ ïgũ turari mera mũare

ĩhadibugũ, taricũ iigũcumi. Pehrerinũ árĩcũ mũare ĩgũ taurare masicũ iigũcumi ĩgũ. Eropirã ĩgũ marire õaro mojomoro ĩacũ ĩarã, ĩgũre Goãmũre mari Opũ Jesucristo Pagũre “Õagũ, turagũ ãhrimi,” arĩ umupeoro gahmea marire.

⁶ Eropa ĩgũ taumorã árĩrã bũrigã mucubiriro gahmea. Mero i yeba mũa árĩropẽ, bajasuburi mũa ñero tariquererã ta bũrigã mucubiriro gahmea.

⁷ Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ĩgũre. Mũa ñero tariquererã Jesucristore umupeoniguicũ mũa umupeoripũ yuju diaye árĩbeaa. Eropigũ mũa ñero taricũ ĩagũ “¿Árĩro ta mũa yũre umupeori?” arĩ queoñagũ iimi Goãmũ mũare. Mũa eropa ñero tarirã diaye ta Cristore õaro umupeoniguicũ “Õaro iiabũ mũa,” arĩgũcumi Cristo mũare. Eropigũ Jesucristo dujarigũ mũa ĩgũre õaro umupeoniguirãre õaro ĩagũcumi mucubiriri mera.

⁸ ĩgũre Jesucristore ĩabiriquererã mahia mũa. Eropirã dohpaguere ĩgũre ĩabiriquererã ta ĩgũre “Diaye ta iigũ ãhrimi,” arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria.

⁹ Eropigũ Goãmũ mũare peamegue wabonirãre taricũ iigũcumi mũa ĩgũre õaro umupeoro mera.

¹⁰ Goãmũ ĩgũ masare eropa tauborore iri-bojegue Goãmũ yare weremũhtanirã irire ma-

sidiarã serēpi ãamuriñuma.

¹¹ Cristo ãgu ñero tariborore, ãgu sãridigu masa m̃ariaborore, árĩpehrerã tauro opa ãgu árĩborore erã ero coregue ta weremãhtañuma. Jesucristo ãgu Espiritu Santo ãgu itamuri mera eropa wereñuma erã. Erã eropa weremãhtaquererã erã wererare masibiriñuma. Eropirã erã wererare òaro masidiarã serēpi ãamuriñuma erã Goãmure.

¹² Iri erã werera Jesucristo ariburi erã ya árĩburi árĩbiriyo. Mari òaro árĩburi árĩyo. Irire erãre masicã iiñumi Goãm. Eropirã dohpaguere umarogue obeodigu Espiritu Santo ãgu itamuri mera òari buherire muare gua werea. Iribojegue mua ya árĩburire erã weremãhtara iri ta árĩcãro tiiaa dohpaguere gua muare wereri. Iri buherire anyua sã burigã masidiariñuma.

Goãm marire ñeri marirã árĩdoremi, arĩ gojañumi Pedro

¹³ Eropirã òarire guña masi árĩyuque mua. Eropirã guhyadiaro árĩque. Cristo ãgu dujaricã Goãm muare ãgu òaro tauborore guñaque. Eropirã irire òaro mucubirimãhtarã coreque.

¹⁴ Iribojegue Goãmure masinibirãgue ñerire uaribejarã árĩm̃arinirã árĩribu mua. Dohpaguere irire iibiricãque. Eropirã majirã erã pagu samarãre òaro yãhriro dopa ta Goãmure òaro yãhririque daja.

¹⁵ Eropirã ãgu yarã árĩmorãre muare si-hubeodigu ñeri marigu ãgu árĩro dopa ta mua sã ñeri marirã ta árĩque. Eropirã òari dihtare iirã árĩque.

16 Eropa ta arĩ gojañuma Goãmũ yare erã gojarapũgue: “Ñeri marigũ ãhraa yũhũ. Yũ eropa árĩcũ mũa sã ñeri marirã árĩque,” arĩmi Goãmũ, arĩ gojañuma.

17 Īgũ Goãmũ mari Pagũ yujurãyeri árĩpehrerã erã iirare ĩagũ yujuro mera beyemi ĩgũ erãre. Īgũ eropiigũ árĩcũ ĩgũre “Ahũ,” arĩdiarã ðaro ĩqunerire Ɂaribejarã árĩmũrine. I yeba mũa árĩropẽ gũhyadiaro mera ðaro ĩque mũa.

18 Mũa ñecũ sũmarã mũa erã árĩricũri ne duhpiburi árĩbiriyo. Mũa sã erã ĩdiro dopa ta iinirã mũa árĩquerecũ ta Cristo mũare ĩgũ yarã árĩmorãre iimi. Mari wajamorire ĩgũ wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irire ðaro masia mũa. Eropa wajayebasagũ ĩgũ niyeru mera, oro mera wajayebasabirimi. Niyeru, oro sã dederea waroca.

19 Īgũ di cóãra mera ta wajayebasami mari ñeri iira dipuwajare. Ovejagã erã Goãmũre obodigũ ðagũ ĩgũ árĩdiro dopa ta Jesucristo ðagũ ñeri marigũ árĩdigũ árĩmi.

20 Iribojeguere i yebare ĩgũ ĩhacũnuguboro coregue Jesucristo ĩgũ eropa waborore masituhapũ mari Pagũ Goãmũ. Dohpaguepũre pehrerinũ coregã árĩcũ, Cristo sĩribasami mũare mũa ya árĩburire.

21 Eropirã Jesucristo ĩgũ itamuro mera Goãmũre umupeoa mũa. Goãmũpũ Cristore sĩridigũre masudigũ árĩmi. Eropigũ ĩgũre Ɂmarogue apigũ, árĩpehrerãre ĩgũre umupeocũ

iipũ mari Pagũ. Īgũ eropiicũ ĩgũre mari Pagũre “Diaye ta iigũ āhrimi,” arĩ umupeoa mũa. Mũa eropa umupeocũ õaro iimi mũare. Eropirã mũa ĩgũ mera õaro árĩniguiborore õaro masia mũa.

²² Ōari buherire diaye majare yũhrirã mũa ñerire duhunirã āhraa mũa. Eropa árĩrã, diaye ta mari acawererã Jesu yarãre mahi umupeo-masia mũa. Eropirã mũa mera majarãre mũa sĩporãri mera turaro mahi umupeoque.

²³ Mũa dipaturi masa dehyoaro dopa ta Goãmũ porã wahabũ mũa. Mari pagũ sũmarã mera masa dehyoanirã árĩrã, pũhrũ sĩria warãca. Iri iro dopa árĩbeaa Goãmũ porã mũa wacũ. Goãmũ mera árĩniguicãrãca. Goãmũ ĩgũ buheri mera ĩgũ porã wahabũ mũa. Iri buheri pehrebiriburi buheri marire Goãmũ mera eropa árĩniguicũ iiaa.

²⁴ Ōpa āhraa Goãmũ yare erã gojarapũ: Árĩpehrerã masa taa iro dopa wahama. Eropiro õari erã opari sã gori iro dopa āhraa. Taa masa, sĩria wahaa. Gori sã masa, sĩria wahaa. Iri taa iro dopa ta mari masa sã wahaa.

²⁵ Mari Opũ ya buheripũ ne pehresome. Īgũ arĩdiro dopa ta eropa waroca, arĩ gojañuma. Iri buheri mũare erã werera õari buheri ta Jesucristo marire tauburi buheri ta āhraa.

2

¹ Eropirã árĩpehreri ñeri iirire, erã pũrupũpũ erã ñero ii corerire, gajirã gajinore opacũ ĩhaturirire, gajirã ñeri quere moarire, irire duhuque mũa.

2-3 Mari Opu mũare ðaro İgu iirire dabero masituhaa mũa. Eropirã ne masa dehyoarãgã apĩcore erã gamero dopa ta mũa sã ðari buherire Goãmũ yare turaro gameque. Eropa İgu yare gamerã mũa İgure mũa guñaturanemorãca. İgu yarã ðaro pee masirã arĩrãca.

Cristo ojocaricũ iigu utãye iro dopa arĩgu ãhrimi, arĩ gojañumi Pedro

⁴ Cristo ojocaricũ iigu utãye iro dopa arĩgu ãhrimi. Masa Cristore gamebirima. Erã gamebiriqerercũ Goãmũpu İgu Pagũpu İgure beyedigũ arĩmi. Ōatariagu ãhrimi. İgu eropa arĩgu arĩcũ İgure gameque.

⁵ Eropirã mũa Jesu yarã arĩrã mera Goãmũ ãhrimi. Eropirã yujuro mera İgu yare ðaro iirã arĩque mũa. İgu ya arĩburire mũa iimorãre beyedigũ arĩmi. Eropirã mũa Jesucristo itamuri mera İgu yare ðaro iirã İgu Goãmũre mucubiricũ iiaa.

⁶ Ōpa ãhraa Jesucristore Goãmũ yare erã gojarapũ:

Cristo utãye iro dopa yũ beyedigũ ãhrimi.

Eropigu ðatariagu ãhrimi. İgu mariro yaharã wamasibeamã. Eropigu İgure Jerusalengue dohpague apigu iiaa. İgu masare ðaro arĩcũ iigucumi. Eropirã İgure umupeorã mucubiriniguirãcoma, arĩmi Goãmũ, arĩ gojañuma Goãmũ yare weremũhtanirãgue.

⁷ İgure umupeorãpu “Ōatariagu ãhrimi,” arĩrãcoma. İgure umupeobirãpu ñero

warãcoma. Erãre õpa ãhraa Goãmũ yare erã gojarapũgue:

Ihĩ Cristo utãye iro dopa ta Goãmũ beyedigu ãhrimi. Igũ Goãmũ beyedigu árĩquerecũ masa igũre gamesome. Igũre gamebiriquerecũ Goãmũ igũre opu acumi árĩpehrerãre dorebure, arĩ gojañuma.

⁸ Õ sãre arãa Goãmũ yare erã gojarapũ:

Igũ utãye iro dopa árĩgũre gamebirã dederea warãcoma, arĩ gojañuma iribojeguere.

Eropa gojarã Jesucristore masa gamebiriburire õpa arĩ gojamũhtañuma. Erã igũre gamebirã Goãmũ ya buherire yũhribirima. Cristore gamebirã, igũre tarinũgarã, Goãmũ pohrogue ejasome erã. Erã eropa waborore aripu Goãmũ erãre.

Õpa ãhrima Goãmũ yarã, arĩ gojañumi Pedro

⁹ Mũaru Goãmũ igũ beyenirã ãhraa. Igũ mari Opu igũ yarã pahia igũ yare itamurã ãhraa mũa. Eropirã igũ ya curu majarã ñeri marirã Goãmũ yarã ta ãhraa mũa. Eropigu mũare naitãaro árĩbonirãre boyoropu árĩmorãre, ñerire iibirimorãre, õaripũre iimorãre aĩdigũ árĩmi mũare. Eropa ta aĩdigũ árĩmi Goãmũ mũa igũ õarire igũ õaro iirare gajirãre weremorãre.

¹⁰ Ero coregue duhpimorã árĩbirimũriribu mũa. Dohpague tamerare Goãmũ yarã ãhraa mũa. Ero core mũare mojomoro ãabupu marinimi mũare dohpa. Dohpaguepũre mũare Goãmũ mojomoro ãagũ ãhrimi.

Goãmũ yare iirã árĩque mũa, arĩ gojañumi

11 Yũ mahirã, mũa i umũre wari masa iro dopa ãhraa dohpaguere. Goãmũ pohro wamorã ta ãhraa. Mũa eropa árĩrã árĩcũ, ire turaro werea mũare: Mũa ñeri ùaribejarire iibiricãque. Iri ñerire ùaribejarã, ñerã warã iica mũa.

12 Goãmũre gamebirã watope árĩrã õaro iirã árĩque mũa guare werewũari arĩrã. Mũa eropa iirã árĩcũ mũare dohpaguere ñero werewũadiaquererã mũa õaro iirire masirãcoma erã. Eropa masirã erã Goãmũre “Õagũ, turagũ ãhrimi,” arĩrãcoma. Õpa ta arĩrãcoma Cristo ïgũ i yebague ïgũ dujaricũ.

13 Mari Opũ yare iirã árĩrã õ majarã oparã sãre yũhrique mũa. I yeba majagũre mũa árĩpehrerã tauro opũ árĩgũre ïgũ sãre yũhrique.

14 Goãmũ erã oparãre apipũ tarinũgarãre dipuwaja moamorãre. Eropigũ õaro iirãre “Õaro iiabũ mũa,” arĩdoregũ apipũ erãre. ïgũ eropa apicũ erãre yũhrique mũa.

15 Mũa õaro iicũ ïarã, pee masibirã erã sihajaro mũare weresãdiaquererã ta weresãmasibeama. Eropigũ mũa õaro iicũ gahmemi Goãmũ.

16 Mũa ñecũ sumarã árĩricũri doca árĩnirãre Goãmũ mũare taudigũ árĩmi. Eropa taunirã árĩquererã ta, “Guare doreri mara. Eropirã gũa ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã ãhraa gũa,” arĩ pepique mũa. Eropa arĩ pepirã ïgũ dorerire iique mũa.

17 Árĩpehrerã masare mahi umupeoque. Mari acawererã Jesu yarãre mahi umupeoque.

Goãmure guhyadiaro ãaque. I yeba majagu opu sãre umupeoque.

Cristo ñero tarigu ãgu yujuro bojediro dopa ta yujuro bojeque mua sã, arĩ gojañumi Pedro

18 Mua pohro majarãre weregu iiaa dohpague. Mua ðaro umupeori mera mua oparãre yãhrirã árĩque. Õarã, muare ðaro iirã mera dihtare yãhrirã árĩbircãque. Mua mera guarã sãre yãhrique mua.

19 Mua ñero iibiriquerecũ, muare erã dipuwaja moabocoma. Erã eropa dipuwaja moarare Goãmũ ãgu gamero dopa ta irire mua yujuro bojecũ “Õaro iiaa mua,” arĩgucumi Goãmũ muare.

20 Mua ñero iira wajapu erã muare dipuwaja moasũcũ irire mua yujuro bojequerecũ Goãmũ “Õaro iiaa mua,” arĩsome. Mari ðaro iiquererã erã dipuwaja moasũcũ irire mari ðaro mera guaro mariro árĩcũ yujuro bojecũ Goãmũ marire ðaro ãhasuagucumi.

21 Eropa iimorãre ãgu yarã árĩdoremi Goãmũ muare. Cristo sã mua ya árĩburire ñero tarimi mua ãgure ãhacũboro dopa.

22 ãgu ne ñero iibirimi. Eropigu ne guayabirimi.

23 ãgure turicũ, ãgupu erãre ne turi gamebirimi. ãgure erã ñero iiquerecũ ta “Muare ñero iigura,” ne arĩbirimi ãgu. Eropigu “Aha queoro dipuwaja moagu ãhrimi. ãgugue amugucumi,” arĩ pepiñumi ãgu. Eropirã mari sãre ãgu iidiro dopa ta iiro gahmea.

24 Īḡu Cristo ĭḡu basi crusague mari ñeri dipuwaja sīrimi. Eropa sīrimi dipaturi mari ñerire iibiriboro dopa, Goām̄u gamerip̄are mari iiboro dopa. Īḡu ñero camic̄umi marire peamegue wabonir̄are marire taric̄ũ iibu.

25 Oveja er̄a dedereboro dopa ta m̄ua s̄a peamegue dederebonir̄a ár̄irib̄u. Dohpaguep̄are Cristore umupeor̄a ĭḡu yar̄a wahab̄u pare. Eropiḡu ovejare ĭhadibuḡu iro dopa Cristo m̄uare ĭhadibumi. M̄ua s̄ipor̄a mera dederebiri-borore õaro ĭhadibumi.

3

Mojoto dirir̄are õpa iiro gahmea er̄are, ar̄i gojañumi Pedro

1 Eropiḡu pohro majar̄are yu dorediro dopa ta m̄ua maras̄a nomere doreḡara. M̄ua marap̄u s̄umar̄are õaro yuhrique er̄a Goām̄u buherire er̄a gameboro dopa. Yujur̄ayeri m̄ua marap̄u s̄umar̄a Goām̄u buherire gamebir̄a āhrima. Er̄are m̄ua yuhric̄ũ ĩar̄a Goām̄u ya buherire gamebocoma er̄a. Eropir̄a iri buherire m̄ua er̄are werebiriq̄uer̄ec̄ũ ta ĭḡu yare gamebocoma er̄a.

2 Eropa ta gamebocoma m̄ua er̄are õaro iirire, m̄ua umupeori s̄are ĩar̄a.

3 M̄ua nome, m̄ua poaire w̄apuwea seap-atanir̄a nome, oro dari b̄yanir̄a nome, õari suhri sañanir̄a nome ár̄ĩdiarire guñabiric̄aque m̄ua. M̄ua ya d̄up̄u masare ĭhasuac̄ũ iibiric̄aque.

4 Eropa iibir̄a õpa iique. M̄ua pepiri õaro ár̄ic̄ũ guñaque. Eropir̄a m̄ua guhyadiar̄a nome iro dopa gajir̄are nijiyajaro mera iir̄a nome

áríque. Guhyadiaro mera weretamurã árĩrã ipure masare ñhasuacũ iique. Iripu pehresome. Iri ñatariari ãhraa Goãmũ ñacũ.

⁵ Õpa ta iimuriñuma iribojegue majarã nome Goãmũ yarã nome. Erã nome Goãmure umupeorã nome árĩrã, erã marapu sũmarãre ñaro yũhrimuriñuma.

⁶ Eropa Sara igo marapure Abrahãre ñaro mera yũhrimuriñumo. Eropigo ñgure “Opũ,” arĩ piyumuriñumo. Eropirã mũa ñaro iirã nome árĩrã, gũiri marirã nome árĩrã, Sara árĩdiro dopa ãhraa mũa.

⁷ Õpa ta mũa marapu sũmarã sã mũa marapo sãre ñaro iique. Erã nome mari ãma iro dopa turarã árĩbeama. Eropirã umupeori mera ñaro iique erã nomere. Goãmũ árĩpehrerinuri ñgu mera mari árĩniguiborore ñgu mũare odirõ dopa ta ogucumi erã nome sãre. Erã eropa árĩmorã árĩcũ erã nomere ñaro iique. Goãmure mũa serẽrire ñgu yũhribo dopa erã nomere ñaro iique mũa.

Õaro erã iiquerecũ ta gajirã erãre erã ñero iirire werepu Pedro

⁸ I mera weretugura: Mũa árĩpehrerã yujuro mera ñaro áríque. Eropirã mũa mera majarãre ñaro mojomoro ñarã áríque. Mũa acawererã Jesu yarãre pepuri majarã game umupeoque. Eropirã ñaro iique erãre. Eropirã “Gajirãre masitaugu ãhraa,” arĩ pepibirã erã gamero dopa ta iique.

⁹ Gajirã mũare erã ñero iicũ erãre ñero ii gamebircãque. Mũare erã turicũ erãre turi

gamebircãque. Mũare erã eropa iiquerecũ ta õaro iique erãre. Eropirã õaro yũhrique erãre. Irire iimorãre ta apimi Goãmũ mũare õaro iibu.

¹⁰ Eropa ta ãhraa Goãmũ yare erã gojarapũ:

Mũa õaro mucubiriri mera árĩdiarã ne ñero werenigubircãque.

¹¹ Árĩpehreri ñeri iirire duhucãque. Õaripũre iique. Game mũa basi ãhaturiro mariro árĩque. Irire turaro iique.

¹² Õarãre mari Opũ eropa ãhadibuniguicãgũ iimi. Eropigũ ãgũre erã serẽrire eropa peenigucãgũ iimi. Ñero iirãpũre ãgũ gamebeamĩ, arĩ gojañuma Goãmũ yare gojarapũque.

¹³ Õarire mũa turaro iidiacũ gajirãpũ mũare ñero iidiaquererã ta ne yujuro bojesome.

¹⁴ Õaro mũa iiquerecũ ta mũare erã ñero iicũ ãagũ Goãmũpũ mũare õaro iigũcumĩ. Eropirã mũare ñero iidiarãre, “Mũare wejẽrãca,” arĩrãre gũibircãque. Eropirã bũjawerebircãque. Irire pee guñaricũbircãque.

¹⁵ Eropirã mũa Cristore “Gũa Opũ ãhrimi,” arĩ pepirã, umupeoque ãgũre. Eropirã Cristore mũa umupeorire, Goãmũ mera mũa árĩborore, gajirã mũare serẽpibocoma: Erã mũare serẽpiboro core erãre yũhriburire õaro guñayuque. Eropa erãre yũhrirã nijiyajaro mera, õaro umupeori mera wereque erãre.

¹⁶ Õarã árĩque. Eropirã “Ñerire iiaa,” arĩ pepi-some mũa. Eropirã Cristo yare mũa õaro iirã árĩcũ gajirã mũare ñeri quere moarã guhyasiuro warãcoma.

17 Ñerire mari iira dipuwaja mari ñero taricũ òabeaa marire. Eropiro Goãmũ gamecũ òarire mari iira dipuwaja mari gajirã mera ñero taricũ òapũrica iri tamera.

18 Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ĩgũ. Òagũ árĩmi. Eropa árĩgũ ñerã mari árĩcũ mari ya árĩborare ñero tarimi ĩgũ. Ñero tarimi ĩgũ Goãmũ yarã mari wacũ iibu. ĩgũ sĩria wami. Eropa sĩriquerecũ ta ĩgũ sĩporã ojocariyoro.

19 Eropigũ ĩgũ sĩporã mera sĩrinirã mũra erã dipuwaja moaburire corerã erã pohrogue Goãmũ yare wererũ erã sĩporãrire.

20 Erã mũrapũ iribojegue Goãmũre yũhribirimũriñuma. Irisubuguerẽ Noé ĩgũ árĩrasubuguerẽ, wũadiru dohodirure dohogũ iĩñumi. Irirure ĩgũ dohorisubu Goãmũre yũhribirinirã mũra erã yũhricũ gameriñumi. Eropigũ erã yũhriborore yoari boje dipuwaja moabigũ coreriñumi Goãmũ. Yũhribirimũriñuma. Eropigũ erãre dipuwaja moañumi. Eropirã bajamerãgã ocho dihta dia miririñere tariwereñuma.

21 Miricũ erã taridiro dopa ta marire waĩyecũ peamegue wabonirãre mari tariborore ĩhmua. Deco mera marire waĩyecũ mari dũpũre mari gũhrarire tu coero dopa árĩbeaa. Marire waĩyecũ ñeri marirã mari árĩborore Goãmũre mari serẽa. Eropirã Jesucristo ĩgũ masa mũriara mera peamegue wabonirã taria mari.

22 ĩgũ Jesucristo umarogue wadi árĩmi Goãmũ mera dorebu. Eropigũ ĩgũ anyua tauro, umaro

majarã oparã tauro, árĩpehrerã dorerã tauro erãre doregũ ãhrimi.

4

Cristo yarã árĩrã òarire gohrotonirã árĩrãca, arĩ wereñumi

¹⁻² Mari ñero tarirã mari ñero iirire duhucãa mari. Eropa duhucãrã mari dipaturi mari ùaribejarire iibea. I yeba mari árĩropẽ Goãmũ gamerire iiniguirãca. Eropirã Cristo ìgũ ñero tarigũ ìgũ gũibiridiro dopa ta mũa sã ñero tariborore gũibiricãque.

³ Iribojegue Goãmũre gamebirã erã ñerire ùaribejadiro dopa ta iimũriyoro mũa. Gũhyasĩriro mariro ñerire iirã, ñeri ùaribejarire iirã, mereri bosenuri iirã, Goãmũ dorerire tarinũgarã, goãmarã wéanirãpũre umupeorã iimũriyoro. Eropirã iripêta iri ñerire iipurumujucãque pare.

⁴ Eropirã erã mũraro ta iirãpũ mũa dohpa-guere iri ñerire erã mera iibiricũ ãarã erãpũ ãha ùca wahama. Eropirã erã mũapũre ñero wereniguirã, querere goroweoma.

⁵ Erã eropiicũ ãagũ erã ñeri iirare Goãmũpũ serẽpi ãagũ, weretaridoregũcumĩ erãre. Ìgũ ojocarirãre, sĩrinirã sãre beyebu ãhrimi.

⁶ Ìgũ eropa beyebu árĩgũ erã sĩrinirãpũre òari buherire werẽpũ Goãmũ mera erã òaro árĩniguiborore. Eropirã i yebare erã árĩpehrerã masa iiro dopa sĩrinirã árĩquerecũ Goãmũ ìgũ mera erã òaro árĩniguiborore werẽpũ erãre.

7 Pehreburinũ merogã duhyaa. Eropirã õaro pee masirã árĩque. Eropirã Goãmure serēniguicãque.

8 Gajirãre mari õaro mahirã baja gajiropa erã marire ñero iiquerecũ ta eropa ñacãa mari. Eropirã mũa mera majarãre burigã umupeo mahiniguicãque.

9 Mũa mera majarãre mucubiriri mera mũa ya wirigue ñajaridoreque.

10 Goãmũ ĩgu yarã nũcure ĩgu yare mũa mohmemasiburi nũcure apimi. ĩgu eropa apicũ mũa iimasiro dopa ta mũa mera majarãre irire õaro itamuque. Goãmũ mũa nũcure mũa ĩgu yare mohmemasiburi nũcure apimi. ĩgu apirañe mera gajirãre õaro itamurã, Goãmũ ĩgu apidiro dopa ta õaro iirã iiaa mũa.

11 Eropirã mũa õaro wererã árĩrã, Goãmũ ĩgu werebodiropo dopa ta õaro wereque mũa sã. Masare itamurã árĩrã, Goãmũ ĩgu apira turari mera gajirãre itamuque. Árĩpehreri mũa iira nũcũ Goãmure masa erã umupeoboro dopa irire iique. Jesucristopũ mũa irire iicũ itamugũcumĩ. ĩgure árĩpehrerinũri umupeoque. “Õagũ, turagũ ãhrimi,” arĩro gahmea árĩpehrerãre. Eropa ta arĩporo.

Jesu yarã erã arĩri dipuwaja erã ñero taririre were gojañumi Pedro

12 Yũ mahirã, dohpaguere ñetariaro tarirã, “Gajiropa arĩro wãca yũre,” arĩ guña iibiricãque. Mucubirirã árĩque.

13 Bũjawerebirã ta mucubirirãpũ árĩque. Eropirã “Cristo ĩgu ñero taridiro dopa ta gũa sã

eropa ta wahaa,” arĩ mucubirique mũa. Eropa mucubirirã Cristo ïgu õarire ïgu ïhmuḡu du-jaricũ mũa turaro mucubirirãca.

¹⁴ Cristo yarã mũa árĩri dipuwaja gajirã mũare erã turicũ Goãmũ ïgu Espĩritu Santo ïgu õaḡu mũa mera árĩḡu iimi. Eropirã õaro mucubirirã ãhraa mũa.

¹⁵ Eropirã masare wejẽra waja dipuwajacurã, yajara waja dipuwajacurã, ñero iira waja dipuwajacurã, gajiropa arĩ goroweora waja dipuwajacurã árĩbiricãque. Iri dipuwaja mũa ñero taricũ ñehe ãhraa.

¹⁶ Cristo yarã mũa árĩra wajapũ ñero taricũ õhaa. Eropirã Cristo yarã mũa árĩcũ ïha ñero iima mũare. Erã eropiicũ ḡuhyasĩribiricãque. Ñero tariquererã ta Cristo yarã mũa árĩrire mucubirirã, Goãmũre “Õhaa,” arĩ umupeoque mũa.

¹⁷ Goãmũ ïgu yarã erã iirare ïgu bey-erisubũ árĩro iiaa dohpaguere. Árĩpehrerã mari ïgu yarã mari iirare ïha serẽpimũhtagucumi. ¿Eropa marire serẽpimũtagũ dohpa iigucuri ïgu yarã árĩbirãpũre mũa pepicũ? ïḡure yũhribirininãpũre turaro dipuwaja moagucumi.

¹⁸ Eropirã õarã ïgu yarã eropa ñero tarira pũhrũ Goãmũ erãre tau erãre ïgu pohro aĩagucumi. Goãmũre gamebirãpũ ñetariaro tarirãcoma. Eropirã dederea wa peamegue warãcoma.

¹⁹ Eropirã Goãmũ ïgu gamecũ mũa ñero tarirã árĩrã, õarire mũa iirare duhubiricãque. Eropirã mũare ïhacũnugudigũre mũare ne duhubigũre ïḡure umupeoro ḡahmea. “Yũre

ĩhadibugũcumi,” arĩro gahmea.

5

Jesu yarã erã iiborore were gojañumi Pedro

¹ Dohpaguere mũare Jesu yarã oparãre weregũra: Yũhũ Jesu yarã opũ āhraa. Mũa sã erã oparã ta āhraa. Mũaare yũ iro dopa oparã árĩrãre ire werebu iiaa yũhũ: Cristo ĩgũ ñero tarirare ĩadigũ árĩgũ, mũa mera mũmarogue Cristo mera õaro árĩniguibu árĩgũ ire mũare weregũra:

² Goãmũ yarã oveja iro dopa āhrima. Mũaopũ ovejare ĩhadiburã iro dopa āhraa. Eropirã Goãmũ mũare ĩgũ apinirãre ĩgũ yarãre õaro ĩhadibuque mũa. Eropirã Goãmũ ĩgũ gamediro dopa ta õaro sĩporãcũri mera erãre ĩhadibuque. Eropirã erãre ĩhadiburã “Niyerure wajatarãca,” arĩ pepibircãque mũa.

³ Eropa ĩhadiburã erãre pũriro mera dorebirabircãque. Eropirã õaro iique mũa Jesu yarã mũare erã ĩhacũboro dopa.

⁴ Mũa eropa iirã Cristo marire árĩpehrerãre ĩhadibugũ ĩgũ dujaricũ ĩgũ mũare õarire oburire oparãca. Iri mũa opaburi ne pehresome.

⁵ Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque.

“Õatariagũ āhraa,” arĩ pepirãre Goãmũ gamebeami. Gajirãre umupeorãpũre “Bu árĩrã āhraa,” arĩ pepirãpũre õaro mahi itamumi ĩgũ, arĩ gojara āhraa.

6 Eropirã Goãmũ turagupũre mũare dorecũ yũhrique. Eropirã mũa basi “Yũ ðagũ ãhraa,” arĩ pepibiricãque. Mũa eropa ðarire iicũ ïagũ Goãmũ ïgũ queoranũ árĩcũ masa ïhuro mũare “Õarã ãhrima,” arĩ ïhmugũcumi.

7 ïgũ mũare wũaro pepi ïhadibumi. Eropirã ïgũre guñaturarã, ne wũaro bujawere guñaricubiricãque mũarũ.

8 Mũaare ïhaturigũ watĩ yee guagũ ïgũ ehma baro iro dopa ta ãhrimi. Mũaare ñero iidoregũ goroweodiami. Eropirã pee masi árĩque.

9 Árĩpehrologue sãre gajirã Jesu yarã eropa dihta teboricũma watĩ goroweodiari mera. Irire masirã ïgũre yũhribiricãque. Eropirã Cristore umupeorã turaro guñaturaque mũa.

10 Mũa i yeba árĩrisubu dihta watĩ ñero iidorediaro mera teboricũrãca. Merogã ãhraa. Pũhrũ mũa Jesucristo pohro árĩrã, mũare ðarã turarã árĩcũ iigũcumi. Eropigũ mũa sĩñajarã ðaro árĩcũ iigũcumi mũare. ïgũ Jesucristo iira mera árĩpeherrerinũri umũsigue mũa ðaro árĩborore mũare apigũcumi. ïgũ Goãmũ ãhrimi árĩpeherrerãre mojomoro ïagũ.

11 Eropirã umũri nũcũ “ïgũ turagũ ãhrimi,” arĩ umupeorã ïgũre. Eropa ta iirã.

Õadoretuñumi Pedro

12 Ipũgãre miripũgãre yũ mũare gojabeocũ Silvanopũ yũre gojabasami. Silvano Jesu yagũ yũ acaweregũ Jesure duhubigũ ãhrimi yũ pepicũ. Mũaare ðaro werediaa. Eropigũ “I buheri diaye ta Goãmũ mũare ïgũ mahiri buheri ãhraa,” arĩ

weregũ mũare ipũre gojabeoa. Eropirã i buheri mera sĩporã turarã árĩque mũa.

¹³ Mũare ãgũ beyediro dopa ta Jesu yarã Babilonia majarã sãre beyedigũ árĩmi Goãmũ. Erã mũare õadorema. Marco sã yũ magũ iro dopa árĩgũ sã mũare õadoremi.

¹⁴ Mũa mera majarãre bocatĩrirã õaro mera mojoto ñeaque.

Árĩpehrerã mũare Jesucristo yarãre gũa õadorea. Eropa ta árĩque. Iripẽta ãhraa.

Desano

Desano: Goñmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

17771afc-c309-57fd-9ff3-2d5a0cd59ff1